



### III OLIMPÍADA GALEGA DE HISTORIA

#### “FAI HISTORIA CON NÓS #DESDECASA”

29 de maio

A Facultade de Historia da Universidade de Vigo convoca a *III Olimpíada Galega de Historia. Fai Historia con nós #desdecasa*. Por causa da pandemia de COVID-19 esta edición será totalmente virtual polo que se desenvolverá desde as casas dos/as participantes.

#### OBXECTIVOS

- Promover o interese do alumnado de Educación Secundaria pola Historia.
- Visibilizar a importancia da materia de Historia no currículo formativo do alumnado.
- Destacar o aspecto lúdico da aprendizaxe da Historia e a posibilidade de empregar este sistema como elemento avaliador nas aulas de Ensino Secundario.
- Estreitar as relacións entre os centros de Ensino Secundario galegos e a Universidade de Vigo.
- Dar a coñecer a Facultade de Historia e o campus de Ourense entre o alumnado interesado no ámbito humanístico.
- Fomentar a relevancia das disciplinas humanísticas para a comprensión e respecto do mundo actual e a súa mellora.

## BASES

### Participación

Poderá participar na *III Olimpíada Galega de Historia. Fai Historia con nós #desdecasa* todo o alumnado matriculado no curso 2019/2020 en 4º de ESO ou ESA dos centros de Ensino Secundario da Comunidade Autónoma Galega.

A participación na proba realizarase mediante equipos. Cada centro só poderá presentar un equipo formado por catro estudantes e un/unha docente encargado/a da preparación e representación a todos os efectos.

A proba terá lugar o día 29 de maio de xeito virtual, a través das aulas do campus remoto da Universidade de Vigo.

### Inscrición

O prazo de inscrición finalizou o día **17 de abril de 2020**.

A inscrición será realizada polo/a docente encargado/a a través deste [formulario](#) que será remitido por correo electrónico a [sdefho@uvigo.es](mailto:sdefho@uvigo.es), indicando no asunto *III Olimpíada Galega de Historia. Fai Historia con nós #desdecasa*.

A Olimpíada considérase un acto público, dado que os/as participantes son menores de idade deberase enviar, xunto coa inscrición, a seguinte [autorización](#) que permite o uso das imaxes do evento.

### Probas

Os equipos enfrontaranse nunha competición que seguirá o esquema pregunta-resposta. Cada equipo deberá nomear un/unha primeiro/a voceiro/a e un/unha segundo/a voceiro/a, que actuará no caso de que a primeira persoa que actúe como voceira acuse un fallo na rede, indicando os seus datos na folla de inscrición.

As probas cinguiranse aos contidos do currículo da materia de Xeografía Historia de 4º de Educación Secundaria establecidos pola actual lei educativa (LOMCE); dadas as circunstancias extraordinarias restrínxese o temario do seguinte xeito: Europa, ata a 2ª Guerra Mundial inclusive; España, ata a 1ª República inclusive.

Realizaranse sucesivas roldas de probas eliminatorias entre os equipos participantes.

## **Características e roldas de clasificación**

As sucesivas roldas serán a través da aplicación informática **Kahoot**.

Para iso, os/as participantes teñen que descargar a aplicación de Kahoot nos seus dispositivos móbiles (polo menos as/os voceiros/as do equipo) e ao mesmo tempo teñen que contar con outro dispositivo para entrar na aula virtual e seguir as preguntas de cada rolda. Para iso, facilitaráselle ás persoas que concursen o link e o password para acceder.

O sistema de roldas será o seguinte:

- 1ª Rolda (40 preguntas): compiten todos os equipos pasando á 3ª rolda directamente os 4 mellores.
- 2ª Rolda (Repesca) (40 preguntas): os equipos que non se clasificaron na 1ª rolda teñen unha nova oportunidade. Pasan á 3ª rolda os 4 primeiros equipos. (40 preguntas)
- 3ª Rolda: enfróntanse os 8 equipos clasificados, pasando 4 a semifinais.
- 1ª semifinal: enfróntase o 1º contra o 4º equipo clasificado da 3ª rolda. O equipo gañador pasa á final. (40 preguntas)
- 2ª semifinal: enfróntase o 2º contra o 3º equipo clasificado da 3ª rolda. O equipo gañador pasa á final. (40 preguntas)
- FINAL: enfróntanse os equipos gañadores das semifinais. (50 preguntas)

Todos os equipos participarán como mínimo en dúas quendas do concurso.

O terceiro e cuarto clasificado decidiránse a partir das súas puntuacións na rolda de semifinais.

A entrega de premios terá lugar na Facultade de Historia, no campus de Ourense, unha vez que se levante o estado de alerta e as restricións impostas ou derivadas do mesmo.

## **Preguntas**

- Cuestións de verdadeiro ou falso.
- Cuestións de escoller a resposta correcta.
- Identificación dunha personaxe ou obra artística.
- Identificación dun texto.

## **Sistema de puntuación**

A plataforma **Kahoot** encárgase de xeito automático de contabilizar a puntuación (acertos e tempo) acadada por cada equipo.

## **Data e lugar de celebración**

Desde casa! o 29 de maio de 2020. O horario concretarase coa suficiente antelación.

## **Propostas de premios** (en función do orzamento dispoñible)

Os/as participantes recibirán un diploma acreditativo e un pequeno agasallo.

Equipo gañador: unha tablet a cada compoñente do equipo e un lote de libros e un trofeo para o centro escolar. A/O docente encargada/o do equipo recibirá como agasallo unha fin de semana nun balneario da empresa Caldaria para dúas persoas.

Segundo premio: un libro e un bono de 75€ para unha tenda de videoxogos a cada compoñente do equipo e un lote de libros e un trofeo para o centro escolar. A/O docente encargada/o do equipo recibirá como agasallo unha fin de semana nun balneario da empresa Caldaria para dúas persoas.

Terceiro premio: un bono de 50€ para unha tenda de videoxogos a cada compoñente do equipo e un lote de libros e un trofeo para o centro escolar. A/O docente encargada/o do equipo recibirá como agasallo dúas entradas ás termas + masaxe en Outariz.

Cuarto premio: un bono de 50€ para unha tenda de videoxogos a cada compoñente do equipo e un lote de libros e un trofeo para o centro escolar. A/O docente encargada/o do equipo recibirá como agasallo dúas entradas ás termas + masaxe en Outariz.

## **Propiedade intelectual e dereitos de imaxe**

*A III Olimpíada Galega de Historia. Fai Historia con nós* é propiedade da Facultade de Historia da Universidade de Vigo, que cede o uso das probas con fins educativos, académicos ou similares, así como en actividades que sexan sen ánimo de lucro e sen efectos comerciais. En calquera uso público deberá citarse a procedencia.

Durante a realización do evento poden ser captadas imaxes ou vídeos con motivo da publicidade ou difusión do evento por diferentes medios de comunicación en uso da súa liberdade de expresión e dereito á información.

A Facultade de Historia da Universidade de Vigo tamén efectuará a divulgación daquelas imaxes e vídeos a través dos seus propios medios de difusión para o cal será necesario obter consentimento previo das persoas participantes e no seu caso, dos/as pais/nais ou titores/as legais dos/as menores participantes.

## **Información sobre protección de datos de carácter persoal**

De acordo co disposto no artigo 13 do Regulamento (UE) 2016/679, do Parlamento Europeo e do Consello, de 27 de abril, relativo á protección da persoas físicas no que

respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento Xeral de Protección de Datos ou "RXP") e co disposto no artigo 11 da Lei orgánica 3/2018, de 5 de decembro, de protección de datos persoais e garantía dos dereitos dixitais, informámoslle que os datos que vostede nos facilite na solicitude, serán tratados baixo a responsabilidade da Universidade de Vigo, coa finalidade de xestionar a inscrición do equipo na olimpíada.

O tratamento dos datos de carácter persoal está lexitimado polo artigo 6.1.e) do RXP para o cumprimento dunha misión realizada en interese público ou no exercicio de poderes públicos conferidos ao responsable do tratamento, en base aos obxectivos do evento que desenvolve os principios da Lei Orgánica 67/2001, de 21 de decembro, de Universidades, de creación, desenvolvemento, transmisión e crítica da ciencia, da técnica e da cultura e a difusión, valorización e transferencia do coñecemento ao servizo da cultura, da calidade de vida e do desenvolvemento económico.

Así mesmo, para a os fins de divulgación dos resultados, dito tratamento estará amparado polo consentimento das persoas interesadas artigo 6.1.a) do RXP. Estes datos trataranse durante o tempo imprescindible para cumprir coa citada finalidade e serán conservados durante o prazo necesario para determinar as posibles responsabilidades que se puideran derivar de dita finalidade e do tratamento dos datos.

Vostede está obrigado a facilitar estes datos en virtude do especificado nos parágrafos anteriores e, en caso de non facelo, as consecuencias serán non poder prestarlle o servizo.

Vostede ten dereito a solicitar ao responsable do tratamento, en calquera momento, o acceso, rectificación ou supresión dos seus datos persoais e a limitación do seu tratamento. Tamén terá dereito a oporse ao devandito tratamento, así como a solicitar, salvo casos de interese público e/ou exercicio de poderes públicos, a portabilidade dos seus datos.

Devanditos dereitos poderá exercelos mediante solicitude dirixida ao Reitor da Universidade de Vigo e presentada ante o rexistro da Universidade de Vigo, ou calquera dos rexistros indicados no artigo 16 da Lei 39/2015, de 1 de outubro, do procedemento administrativo común das administracións públicas e remitida á Secretaría Xeral da Universidade de Vigo, Campus universitario Lagoas-Marcosende, 36310 Vigo (Pontevedra). Para mais información: <https://www.uvigo.gal/proteccion-datos>

Igualmente poderá dirixir dita solicitude directamente á Delegada de Protección de Datos cuxa identidade e datos de contacto son Ana Garriga Domínguez, Facultade de Dereito, Campus Universitario As Lagoas s/n, 32004, Ourense (España). Teléfono: 988 368 834. Enderezo electrónico: [dpd@uvigo.gal](mailto:dpd@uvigo.gal)

Así mesmo, vostede ten dereito a presentar unha reclamación ante a Axencia Española de Protección de Datos (AEPD).